

Sabtu, 10 Ogos 2019 | 12:52pm



Pasukan Polis Marin (PPM) menahan seorang lelaki yang disyaki menyeludup barang kawalan ketika Operasi Bersepadu di kawasan perairan Sungai Haji Kuning dan sekitar Pelabuhan Tawau, semalam. - Foto ihsan PPM

PPM tingkat kawalan sempadan perairan menjelang Aidiladha

Oleh Abdul Rahemang Taiming
bhnews@bh.com.my

TAWAU: Pasukan Polis Marin (PPM) Tawau akan terus meningkatkan kawalan dan pemantauan di sempadan Malaysia-Indonesia terutama di sekitar perairan daerah ini dalam usaha mengekang kegiatan penyeludupan barangan kawalan menjelang sambutan Aidiladha, esok.

Berikutan itu, satu Operasi Bersepadu bersama Kementerian Perdagangan Dalam Negeri dan Hal Ehwal Pengguna (KPDNHEP) Tawau dijalankan bermula 6 Ogos dan berakhir hari ini.

Pegawai Memerintah PPM Tawau, Deputy Superintendan Mohd Nazari Ismail, berkata operasi selama empat hari itu tertumpu di beberapa kawasan titik panas yang disyaki menjadi laluan dan aktiviti penyeludupan barang kawalan.

Katanya, hasil operasi yang dijalankan anggota PPM dan penguat kuasa KPDNHEP di beberapa lokasi terbabit berjaya mengesan tiga kes membabitkan kesalahan mengikut Akta Kawalan Bekalan selain satu kes penyalahgunaan dadah.

"Sepanjang tempoh Januari hingga Ogos tahun ini juga, PPM Tawau bersama agensi penguat kuasa lain mencatatkan sebanyak 190 kes membabitkan pelbagai kesalahan dengan anggaran nilai rampasan melebihi RM2 juta," katanya pada sidang media, di sini, hari ini.

Yang turut hadir, Timbalan Ketua KPDNHEP Tawau, Yap Kon Fatt.

Dalam pada itu, Nazari berkata pegawai dan anggota PPM Tawau akan bertugas seperti biasa termasuk sepanjang sambutan Aidiladha mulai esok selain menjalankan operasi serta rondaan di kawasan perairan sempadan Malaysia-Indonesia.

"PPM akan terus menguatkuasakan undang-undang sama ada di laut ataupun di darat dan tidak akan berkompromi dengan mana-mana pihak termasuk individu yang didapati terbabit dengan aktiviti penyeludupan barang kawalan.

"Justeru orang ramai diminta supaya memberi kerjasama dengan menyalurkan maklumat berkaitan kegiatan penyeludupan kepada PPM," katanya.

